

Barakaldoko 21 urteko ustezko bortxatzaile bat espetxeratu dute

Uztailetik aske egon da, ADN probaren emaitzen zain

Erredakzioa / Bilbo

F.D.T. Barakaldoko 21 urteko gaztea espetxeratu egin dute lau eraso sexualen egilea izateagatik; erasoak iazko apirila eta uztaila bitartean gertatu ziren udalerrri

horretan. Gaztea uztailean atxilotu zuen Ertzaintzak aipaturiko delituengatik; hala ere, aske zegoen positibo eman duten ADN probaren emaitzen zain. Astelehenean bertan espetxeratu zuten, epailearen aginduz.

IRAGAN urtearen erdialdetik Ertzaintzak Barakaldo inguruan eraso sexualak jasan zituzten hainbat emakumeren salaketak jaso zituen; haietako bat adin txikiko emakume bat zen. Ertzaintzak egiaztatu ahal izan zenez, kasuetako lautan erasotzaileak gune ilun batean ezkutatuta itxaron zien biktimei, ikustezina zen toki batean.

Emakume gazte bat —gehienetan bakarrik zihola— agertzen zenean haren etxeko atariraino jarraitzen zuen. Atarian, bizkarretik erasotzen zion lepoan objektu ziztakari bat jarritz, eta, heriotza mehatxupean, bera masturbatzera behartzen zuen emakumea; gero oinez alde egiten zuen.

Salatutako kasuetako batean —iazko apirilean gertatu zen—, erasotzaileak bere helburua lortu ostean, felazio bat egitera behartu zuen emakume gaztea, eta ondoren bortxatu egin zuen baginatik penetratuz.

Hurrengo hilabeteetan, maiatza, ekaina eta uztailean, beste antzeko hiru gertakari izan ziren. Kasu horietan ez zituen biktimak baginatik penetratu.

Uztailean atxilotu arren, orain arte aske

Ertzaintza Barakaldo inguruan izan zen, eta salatutako gertakari guztiak ikertu zituen: *modus operandi*, erasotzailearen jokabidea, biktimen ezaugarriak eta gertakariak zein ordutan eta non gertatu ziren. Ikerkuntza lanei eta hiritarren laguntzari esker, Ertzaintzak erasotzailea identifikatu eta atxilotu zuen iragan uztailearen 12an; Barakaldoko auzokidea da F.D.T. izeneko 21 urteko gaztea. Beharrezko diligentzia guztiak egin ostean, atxilotua epailearen esku jarri zuten.

Epailearen aurrean deklaratu ostean, F.D.T. izeneko gaztea aske uztea agindu zuen epaileak, atxilotua izan zenean egin zizkieten ADN



XOUSE SIMAL

Barakaldokoa da espetxeratutako gaztea. Artxiboko argazkian, herri horretako kaleetako bat, AHVko lantegien ondoan.

proben emaitzak eskuratu bitartean. Joan den astelehenean, abenduak 28, egindako azterketen emaitzak hartu zituzten, eta bildutako laginek atxilotua eraso sexualen

ustezko egilea zela frogatu zuten. Ondorioz, epaileak 21 urteko Barakaldoko gaztea berehala atxilotu eta espetxeratzea agindu zuen iragan astelehenean.

Santurtziko gaztea aske

Erredakzioa / Bilbo

USTEZ 17 eraso sexual egiteagatik asteen atxilotu duten Santurtziko M.L.A. 19 urteko gaztea aske utzi du Barakaldoko laugarren Argibide Epaitegiko epaileak, «frogarik ez izatea» argudiatuz.

Santurtziko gaztea joan den astelehen goizean atxilotu zuen Ertzaintzak, azken bi urteotan ustez 17 eraso sexual egiteagatik. Auzi horren biktima guztiak adin txikiko neskak dira, eta Santurtzin eta Portugaleten izan ziren erasotuak.

Erasoak duela bi urte hasi ziren arren, biktimak inolako salaketarik ez jaritzeak orain arte bortxaketan berri ez izatea ekarri zuen, baita ikerketa lanak atzeratzea ere.

Ertzaintzak joan den

azaroan hasi zituen ikerketak, eta astelehenean bukatu zituen, ustezko erasotzailea atxilotzean. Santurtzin atzeman zuten gaztea, herri horretan eta Portugaleten ustez egin dako erasoengatik.

Gazteari egotzi zizkieten eraso guztiak sexualak izan baziren ere, salaketa jarri duten gazteen datuen arabera, bortxatzaileak sei alditan lortu zuen koitoa gauzatzea.

17 adin txikikoren ustezko bortxatzailea astelehenean atxilotu zuten, eta, beharrezko ikerketak egin ondoren, Ertzaintzak Barakaldoko laugarren Argibide Epaitegiko epailearen esku utzi zuen asteazkenean. Epaile horrek, oster, aske utzi zuen ostegunean bertan, «frogarik ez izateagatik».

laburrean

■ Gizonezko bat hil zen atzo goizean Gasteizen izandako auto istripuan


GIZONEZKO bat hil zen atzo Gasteizen izandako auto istripuan. Eusko Jaurlaritzako Herrizaingo Sailak emandako informazioaren arabera, 72 urteko B.C.H. gasteiztarra da hildakoa. Istripua goizeko zortziak aldera gertatu zen N-240 errepidean, Gasteiz barruan. Zergatik ez dakitela, B.C.H.k gidatzen zuen Citroen Xantia kotxea errepidetik irten zen. B.C.H.rekin batera kotxean zihoan 42 urteko J.A.G.C. larriki zauritu zen, eta Txagorritxuko erietxean ingresatu zuten. Azken hori kotxearen barruan geratu zen harrapatuta, eta suhiltzaileek atera behar izan zuten.

■ Gizonezko bat hil zen asteazkenean Astigarragako Ergobia auzoan, trenak harrapatuta

GIZONEZKO bat hil zen asteazken goizean Astigarragako Ergobia auzoan (Gipuzkoa), trenak harrapatuta. DYAK eta Osakidetzak emandako informazioaren arabera, istripua goizeko 09:30etan gertatu zen. Eusko Jaurlaritzako Herrizaingo Sailak oraindik ez du argitu istripuaren zergatia. Osakidetzako medikudun anbulantzia bat istripua gertatu zen lekuraino iritsi zenean, 65-70 urte inguruko gizonezkoa oraindik bizirik zegoen, baina anbulantziako medikuek ezin izan zuten ezer egin hark bizirik segitzeko. x

■ Altubeko mendatean hirugarren bide bat eraikitzeko lehen urratsa egin du Arabako Foru Aldundiak

ALTUBEKO mendatean hirugarren bide bat eraikitzeko lehen urratsa egin du Arabako Foru Aldundiak; eraikuntza proiektua idazteko laguntza teknikorako lanak onartu ditu. A-68 autobidearen alternatiba bilakatuko da Altubeko mendatea lan horien ostean, Arabako Foru Aldundiko teknikarien aburuz. Baldintza kaskarragoak izango dituen arren, dohainik izango dela nabarmendu dute teknikariek. Aipaturiko autobidearen jabetza lortuz gero, Altubeko hirugarren bidea ez zuela eraikiko jakinarazi zuen Arabako Foru Aldundiak. Jabetza lortu ez dutela ikusita, lanei ekitea erabaki dute orain. Lanek 600 milioi pezetako (24 milioi libera inguru) aurrekontua dute. x



ARGAZKILARIA

TSJPVko bost magistratu postu betetzeko deia

Espainiako Botere Judizialaren Kontseilu Nagusiak (CGPJ) Euskal Autonomia Erkidegoko (EAE) Justizi Auzitegi Nagusiko (TSJPV) bost magistratu lanpostu betetzeko deia egin du. Lehiaketa hilabeteko epean erabakiko da; beraz, otsailerako plaza horiek beteta egon daitezke, iturri ofizialek jakinarazi dutenez.